



宗伯集卷之二十一



海馮琦

用韞著

勅諭

擬

皇帝勅諭大學士申時行

朕勤思上理倚毗忠賢睠惟理陰陽之官  
原非程歲月之效乃若政成九載勲冠羣  
僚百揆奮亮采之庸三考符陟明之典特  
申褒勞具在彛章卿雅度冲襟宏猷卓識

宗伯集

卷二十一

一

才堪命世而寬足以有容道可經邦而智  
行所無事越從講席簡在綸扉首列三事  
之班仰贊萬幾之重調劑庶政如鹽梅麩  
蘖之和董正百官有羔羊素絲之節雅持  
大體獨仗朴忠登延多耆碩之英召對矢  
謀猷之告布寬大之詔令藹若春溫決戰  
守之機宜明同燭照咸有一德于茲九年  
朝端挹易直之風海內享和平之福況元  
宰課功之日正西陲奏凱之辰不有安社

稷之臣何以厭疆場之難卿勞惟懋朕志  
允諧乃晉三公之階兼食五等之祿賞以  
延世宴以示恩而卿三讓彌高屢辭未已  
功已成而不處勞以謙而益光庸錫贊書  
以紓眷顧於戲啓乃心匡乃辟朕方嘉傳  
說之賢慎厥始成厥終卿無忘畢公之命  
即今方隅之多事正賴朝廷之有人勉思  
弘濟於艱難乃可對揚乎休命益恢茂烈  
永佐昌圖

宗伯集

卷三

二

誥勅部

定國公徐文璧

制曰國家褒荅元勳爰及苗裔載在盟府與  
國無極其恩數羣臣莫敢望焉盖其先有  
非常之功非常者非常格所能擬也爾具  
官某紹休前緒綰綬戎樞當天下無事韜  
鈴無所用惟是斤斤遵禮度奉朝請以端  
恪謙退自持劔佩成行惟汝首列珪璧在  
設惟汝肅將念爾為勳臣首事朕久長特

賜爾命不著為令甲於戲惟爾祖有大勳  
勞於國家當其時櫛沐風雨踐涉險阻為  
子孫開業其勤至矣爾是以及此夫惟念  
爾祖修厥德然後可對揚天子之不顯休  
命爾其敬哉

臨淮侯李言恭

制曰戎政大臣總率南北羽林材官馭張所  
以厲武節折奸萌強根本示天下重也  
勳勞不二心之臣無任焉爾具官某才兼

寧伯集

卷之八

三

文武世篤忠貞壯猷奮於請纓逸思徵於  
橫槊副司留都之鑰晉登大將之壇卒乘  
盡屬橐鞬耳目在其旗鼓遠恢上畧獨制  
中權遂使輦轂之間隱有干城之壯宜頒  
異數以祚殊勳是用加爾太子太保錫之  
誥命昔李光弼為大帥一出號令氣色精  
明光弼之封亦臨淮也爾為世臣膺此重  
任遠師武穆之紀律近法韓國之忠勤尚  
克時忱無替朕命欽哉

大學士中時行

制曰朕纘承鴻序總攬萬幾惟二三忠誠不  
貳心之臣是翊是贊矧若元輔康濟時艱  
朝廷以和民有寧宇不有褒荅股肱何勸  
咨爾具官某蹇蹇匪躬休休有度學博而  
知要明古今治亂之原才全而不形得天  
地中和之氣首奉軒墀之對早參帷幄之  
謨在朕方弘衆正之途於卿乃見真儒之  
效簡而有體冲如不盈清靜寧一以綏兆

宗伯集

卷之六

四

民正直平康而訓百職丙言寬大是尚繁  
瑣不預於科條魏相災異必陳憂勤不遺  
於夙夜一德咸有六載於茲蓋惟國家得  
非常之人而後天下享無事之福詢之士  
論大夫國人皆曰賢考其成功四海九州  
罔不若庸稽累朝之舊典以酬再考之  
元勳是用錄廢宴賚投爾階特進光祿大  
夫勲左柱國錫之誥命於戲惟虞廷章服  
以庸在周典旂常是紀作舟楫作霖雨朕

方虛已以責成若手足若腹心卿益矢謀  
而入告無忘君臣之交儆以開宇宙之泰  
和時乃之休惟朕以懌欽哉

禮部尚書兼翰林院學士朱賡

制曰典朕三禮無如伯夷之清教子一經是  
成甘盤之學庸霑露蕭之澤以紓風木之  
悲爾原任直隸揚州府泰州知州累贈通  
議大夫太子賓客吏部左侍郎兼翰林院  
侍讀學士朱公節乃具官某之父本以宿

宗伯集

卷之八

五

儒蔚為循吏筮仕壯縣繼典方州平反懸  
三尺之平操持稟四知之畏惟爾崇德象  
賢之嗣為予責難陳善之臣眷乃啓沃之  
勞疏茲寅清之秩念十年惟惺暫遠闕庭  
邈一德淵源推恩禰廟茲特贈爾如子官  
於戲資事父之敬以致之於君久矣忠悃  
因如母之哀以施及於父式慰孝思歆服  
龍章增華馬鬣

制曰惟臣欽若直哉惟清有母勲勞報之罔

極庸需顯休之命以慰明發之懷爾累贈  
淑人陸氏乃具官某之母系出名宗動閑  
內則婉德君子既宣化於棠陰啓佑嗣人  
乃奮庸於槐路惟蓋臣斧藻之業本慈母  
機杼之勤令範雖違徽音如在是用加贈  
爾為夫人銜痛白華達一日三公之養疏  
恩黃壤膺九原六命之褒

制曰春官和邦國是惟五典之宗賢母嗣徽

音式並三遷之教況新達於五鼎宜申命

宗伯集

卷三

六

於六珈爾累封太淑人葉氏乃具官某之  
繼母化隆正始義克代終穆宣雍肅之風  
光佐循良之譽均鳴鳩之愛若屬於毛奉  
護草之歡言樹之背典我邦禮邈厥母儀  
不有紫綉之須孰慰素冠之惻是用贈爾  
為夫人栢舟著節永流彤管之輝楓陛宣  
綸式作玄扃之賁

太子少保兵部尚書王一鶚

制曰國之大事寄之樞筦之間武之善經謀

之堂皇之上以邊疆之無戰知國家之有  
人中外具瞻安危注意可無恩綈以祚殊  
勳爾具官某材猷弘毅志慮忠純踐更郎  
闡郡牧之官洊登藩臬節旄之寄拊循畿  
甸贊佐機廷克宣西塞之籌全昇北門之  
鎖暨正圻父之位無躋官保之階治已外  
寧壹皆由於指授事從中覆毫不爽其機  
宜惟巨僚規恢九塞之安俾朝廷明見萬  
里之外膚功既奏茂渥宜頒是用授爾階

宗伯集

卷三

七

資政大夫錫之誥命於戲周官六列最重  
夏卿唐制七兵總屬武部爾典司邦政康  
濟時艱西北之邊羽久停何以周謀於桑  
土東南之災報踵至何以杜警於萑蒲益  
弘遠猷以胥後命欽哉

總督宣大山西等處太子太保兵部尚  
書鄭洛

制曰朕顧瞻雄鎮簡命重臣深惟今日之便  
宜頗異昔時之經畧在昔申嚴郊保師中



獨鎮王封於今蕪湖華夷漠外皆稱屬國  
寄屬滋重控制惟艱爾具官某性篤忠貞  
才兼文武爰從侍御夙高列栢之風踐歷  
臬藩茂著采薇之烈秉節旄於西塞佐機  
畫於中樞全畀制閫之權專聽籌邊之畧  
晉卿銜於夏省躋竣秩於春官蓋委以事  
而責以功故加其官不易其鎮爾乃以恩  
威馭虜以整暇治兵措三大鎮於衽席之  
安制兩名王於鞞鐻之末諸將皆遵其約  
東四夷盡憚其風稜召總禁旅之屯以表  
師干之寵課書未奏贊冊宜領是用授爾  
階光祿大夫柱國錫之誥命於戲塞上十  
年揆勲勞之已久軍中三命方恩數之惟  
新茲領王之爪牙寔象天之壁壘折衝厭  
難朕未忘保障之功居重馭輕爾尚謹張  
皇之訓祇服渥命益堅壯圖欽哉

制曰古稱將卒之旋必及室家之感草虫興  
思於此伐鶴埴志慨於東征矧夫睽違間

以存歿不有褒叙曷慰幽潛爾累贈夫人  
陳氏乃具官某之妻柔嘉維則肅雍其儀  
相夫既書績於旂常訓子亦宣勞於郎署  
采薇外寧之治久藉同心奠繫中饋之賢  
已成異世特加贈爾一品夫人式作玄扃  
之賁永垂彤管之聲

曾祖父母

制曰朕錫予勞臣褒寵先代如山川之出雲  
雨有開必先念水木之有本原無德不報

宗伯集

卷三

九

人稱榮邁國有上彝爾原任浙江紹興府  
織染局大使贈通議大夫都察院右副都  
御史鄭臻乃具官某之曾祖父材資稠儻  
性植廉明蓋嘗為織室之官乃獨嚴繭絲  
之戒位雖不滿其德沒而有祀於鄉有仲  
象賢已拜中丞之命曾孫繼美重膺上衮  
之褒流澤彌長保世滋大特贈爾如孫官  
積百年而後興國恩未艾更四世而再命  
家乘方昌

制曰勲庸著於絕塞於人臣為首功寵錫逮於曾闡於人世為異數庸頌休命以獎殊勲爾贈淑人張氏乃具官某之曾祖母柔嘉淑慎宣慈惠和佐夫培瓜瓞之祥迪子任節旄之寄惟我師帥之長子寔爾繩武之曾孫爰遡徽音特頒殊渥茲贈爾為一品夫人蒸畀並隆於烈祖熾昌永茂乎來昆

祖父母

宗伯集

卷三八

十

制曰良士之垂世澤燕翼子以貽厥孫昭代之獎鉅僚肇戎公而錫爾祉豈徒慰光前之志亦以昭裕後之休爾累贈資政大夫兵部尚書兼都察院左副都御史鄭隆乃具官某之祖父名高處士門應德星今世所謂古人間里稱為長者蓄其慶祉啓爾聞孫維翰維垣方舉報功之典是薦是褒可忘種德之勤茲加贈爾如孫官官保馳榮寵在羣僚之上祖孫濟美永垂奕世之

休

制曰穹階極於一品而顯秩侈於重闈固國家報答之上彝亦大臣似續之弘孝爾累贈夫人葛氏乃具官某之祖母稟德靜專挺身孝敬釐爾士女夙培濬哲之祥裕乃後昆允協和鳴之吉鍾百年之餘慶開一代之偉人勛庸既茂於公家尊寵宜歸於王母茲特加贈爾為一品夫人並隆蒸畀之儀益保昌融之祚

宗伯集

卷五

七

父母

制曰价人維藩功已宣於固圉君子有穀教實始於趨庭追敘前休庸申後命爾舉人累贈資政大夫兵部尚書兼都察院左副都御史鄭昱乃具官某之父學窺道岸名在賢書卜玉未酬尚麟漸鴻之志韋金有託式弘詒燕之謀眷子鎖鑰之臣實爾箕裘之緒邇其家法授以國章茲特加贈爾如子官霈綸音於三錫用伸未竟之猷登

位序於六卿益衍無窮之間

制曰國家弘獎孤貞褒予勞勩念國所最重  
無如任事之臣推家所由興以有字孤之  
母可無恩寵以報劬勞爾累贈夫人劉氏  
乃具官某之母躬有令儀嬪於儒彥蚤罹  
未亡人之痛已嗟泛栢之難晚膺大司馬  
之封未竟樹萱之養即今三鎮節旄之寄  
皆由百年機杼之遺茲特加贈爾為一品  
大人九原如在永昭彤史之輝三錫為光

宗伯集

卷三

三

丕闡玄扃之耀

協理戎政兵部尚書傅希贊

制曰周制六卿獨先司馬漢京七校特重壯  
軍況以方叔之壯猷當圻父之鉅任永言  
舊績宜霈新綸爾具官某才猷宏遠志行  
貞純易直有長者之風端嚴得大臣之體  
自分猷蘭中循拊民吏憚其風稜河上轉輸  
滋茂關中循拊民吏憚其風稜河上轉輸  
軍國仰其供億召叅民部晉掌留樞委以

爪牙之師式是股肱之寄何恙不已乃求  
謝於班行年至則還亦憫勞以政事畀晉  
東宮之秩仍兼北斗之階茲加爾太子少  
保授爾階資政大夫錫之誥命於戲重老  
成之禮庸以褒荅勲勞高止足之風亦以  
靜一瀛競豈必仕而補益於國方將歸而  
表正於鄉俾壽而康式燕且譽欽哉

吏部左侍郎趙煥

制曰天下莫難於用人莫難得用人之人得

宗伯集

卷三

三

用人之人而治理可幾而興也則微王爵  
大臣孰任哉爾具官某操檢貞純器識宏  
亮起家邑令擢列臺班執法殿中巡行郡  
國不茹不吐望實並孚及拜中丞風采彌  
著南北之績中外所瞻俾貳冬卿踐更銓  
部乃能宣誠殫力以贊厥長開大公之路  
杜羣枉之門振鷺盈庭鴻鸞漸羽時惟乃  
勞朕志以懌茲以考績授爾階通議大夫  
錫之誥命於戲銓衡為六卿之長卿貳鄰

八座之崇朕方愛惜人才惟汝甄敘朕方  
綜覈吏治惟汝贊襄尚益多於前勞用顯  
承乎後命汝其懋哉

刑部左侍郎何源

制曰朝廷所操以治天下惟三尺法耳朕痛  
小民無知而罹於文罔故數詔緩天下大  
辟惟司寇少司寇守文釋滯是攝是贊以  
制百姓于刑之中諭朕志焉爾具官某清  
謹端亮恬于聲利自邑牧更諸曹郎為天  
官之屬廷中皆稱其公平擢拜奉常拂衣  
高謝頃采廷論起爾田間踐歷卿寺以佐  
大宰於留都及召貳司寇而爾益清白奉  
職察麗求中庶獄亡寃五刑惟允庶幾所  
稱淑問者焉所司計爾歲績來奏是用授  
爾階通議大夫錫之誥命於戲爾祖喬新  
以大司寇表著於先朝爾紹厥家聲典茲  
邦禁惟子孫必復其始尚克時忱乃亦有  
終欽哉欽哉惟刑之恤

南京兵部右侍郎王世貞

制曰國家培根本於留都握樞機於夏首總  
中臺之鎖鑰當南紀之襟喉故雖貳卿之  
班儼有居守之重能私斯任繫惟其人爾  
具官某以博極千古之學而發之詞章以  
高擅一代之才而措為經畫自西曹綰綬  
及東土褰帷偶家難之橫罹謝朝榮而遠  
引起更外服游陟中丞身屢退而望實彌  
高官再起而勞能益著擢贊士師之治改

宗伯集

卷天

五

梁圻父之籌朝廷方詢耆宿之謀天平始  
見文章之用茲已擢爾司寇屬以祥刑適  
最績之來聞嘉成勞之已久是用授爾階  
通議大夫錫之誥命詰戎厭難既已董正  
於六師弼教明刑尚其敷陳於九德勉著  
平反之效頒行寬大之條徃悉乃心以稱  
朕意

王世貞文行

制曰蓋臣狗圖之忠蒙九死而靡悔善人積



德之報歷再世以彌昌士論久而後明天道定而始勝雖沒不朽惟國有章爾原任都察院右都御史贈兵部尚書王抒乃南京兵部右侍郎世貞之父天與孤忠人推亮節爰從臺憲即荷眷知感島夷於江南摧虜氛於薊北棘門禦侮詎忘疆場之勞請室蒙辜原非朝廷之意庸採輿論追晉崇階餘慶所鍾啓爾象賢之子遺忠未泯作子華國之臣瞻念義方宜申寵命是用

宗伯集

卷五

六

加贈爾資政大夫於戲六月清霜雪沉寃於既往元原白日照幽鬼以如存歆服廷綸永光廟祏

已故原任少保太子太保兵部尚書

王崇古

制曰蓋聞非常之原常人懼焉乃臻厥成天下晏如夫業已收晏如之效而思始事之臣其事存其人亡所以列鍾鼎以書勞聽鼓鼙而太息者也爾已故原任其官某博

大有謀沉雄善斷綿更外服踐歷戎行洎  
擁節旄任惟鎖鑰總齊秦隴爰及晉代知  
無不為險夷以之當叩關方殷盈庭未決  
先皇帝宸斷惟爾實肅將之遂使名王盡為  
屬國兵革之喘息輸將之費省邊境以安  
朝廷以尊本爾受那吉降始終區畫力也  
入本兵柄益暢曷籌雖懸車高謝而邊臣  
守遺冊匈奴循故約以迄於今蓋古之大  
臣四夷聞安否關國重輕者爾庶幾焉何  
疾不已遽委霜露老成凋謝深軫朕懷是  
用贈爾太保謚襄毅錫之誥命以爾有大  
勲勞故命曰襄以爾定大謀議故命曰毅  
生為人豪歿膺國恤古稱不朽於是乎在  
九原可作女其歆哉

原任南京禮部尚書姜寶

制曰蓋聞禮之用可以推而致之天下然必  
始自根本之地而表以耆宿之臣然後風  
化興焉爾具官某才優經濟學富典墳爰

自詞林出司學政迨回荆於卿寺乃簡界  
於成均高標久遂於明農徵詔獨先於求  
舊起自九卿之列游躋八座之崇五刑屬  
邁德之臣三禮重秩宗之任寅清匪懈夙  
夜在公方登課績之書遽有乞休之請愍  
勞以事俾即厥安揆爾舊勞疏茲新命是  
用授爾階資政大夫錫之誥命於戲三載  
陟明朕方詢於黃髮七旬致政爾已謝於  
華簪蓋昔之進而服其官及今雖退而必  
以禮嘉我三朝之耆舊全爾一德之始終  
勉服訓詞以綏福祉欽哉

南京祭酒趙用賢

刑曰朕紹休先烈乃命儒臣勅成大典為道  
揆法守敎其勞勩增秩賜金有差而大者  
復下璽書褒予之蓋其重也爾具官某剛  
方直諒博大忱恂起自廷掄列於館署高  
文共傳其典冊抗疏獨重乎綱常身雖折  
而不回名在野而彌著召還禁近擢真官

僚充金華啓沃之班典石室編摩之事東  
觀袖書甫就南雍教胄方新念爾成勞疏  
茲顯命茲授爾階朝議大夫錫之誥命於  
戲治至有周盛矣所稱維周之楨者惟文  
王之與王國之士也爾服此褒嘉職司文  
教必使留都根本之地常有羣雖豐芑之  
風益殫忠猷以需特簡欽哉

翰林院修撰朱國祚

勅曰詞臣日執筆侍朕左右所以公紀載明

宗伯集

卷三十一

五

得失至華近也爾具官某氣資端雅才識  
茂明首被廷掄筮官禁秘而爾遜志惟敏  
操行益淳公車擅得士之稱左史循紀言  
之體修途伊始大受克堪茲以考績授爾  
階儒林郎錫之勅命於戲詞臣之學術盖  
將遠綜千古詞臣之作用盖將上弼一人  
士所稱為第一者乃不獨在科名爾第不  
愧科名如昔人者可矣朕且持是以觀汝  
之成汝惟敬哉

翰林院編修鄒德溥

勅曰翰苑之臣前代所謂朞明著作之署國家所以儲養端良而待才用之府也爾具官某學本家傳才為國寶簡自常吉列在清華而爾遜志惟勤裊躬滋慎聲實並茂遠大可期蓋古稱閱覽博物之儒爾庶幾焉是用授爾階文林郎錫之勅命夫所貴於詞臣者惟是修明聖學練悉朝章非徒以詞賦為君子也無忘忠飭以俟崇寄欽

宋伯集

奎元

三

狀

翰林院檢討葛曦

勅曰朕頃命儒臣更直史館蓋以直紀載而備顧問非徒待詔金馬侈盛事而已爾具官某識度端醇文詞爾雅爰從甲第列在詞林而爾綜述滋勤操持彌慎東觀循紀言之體南宮擅得士之聲是用授爾階文林郎錫之勅命於戲在昔爾祖守禮以朴忠亮直著在先朝尚舊典刑是惟予治爾

其深陶厚植祇率先猷勿替朕言以需大  
受欽哉

刑科右給事中邵庶

勅曰諫官切劘人主紀綱國體有能補袞闕  
而裨國論朕且虛懷聽焉爾具官某性資  
端雅學識茂明擢秀大廷儲材中秘博綜  
厚植議論有餘朕采板垣讜言入告可謂  
不愧其官矣茲用授爾階徵仕郎錫之勅  
命夫天下之事諫官無所不得言而朕所  
欲亟聞者惟是國家大計朝廷大體司馬  
光不云乎急其大緩其小於獻納之準  
汝其懋哉

山東巡撫李戴

制曰朕方勤恤民隱綜覈吏治命大中丞持  
節往拊循而表率之是百僚之所仰流百  
姓之所歸命也而况海岱之間夙稱重鎮  
績用既著褒勞可後哉爾具官某冲凝遠  
器敏練長才製錦專城蚤播循良之譽伏

蒲鎖闥茂楊審諤之聲晉長外臺游登左  
轄方詳試以政事爾能克懋於將明遂  
假節鉞之崇俾視保釐之任乃能規恢石  
畫弘濟時艱有釐奸戢暴之猷有關土墾  
田之惠已下邦刑之命正登課最之書是  
用授爾階通議大夫錫之誥命於戲山甫  
賦政乃爰發於四方臯陶明刑庸載陳於  
九德尚祇承於後命益求多於前勞度此  
祥刑訓于厥屬若朕欽恤汝則有辭

宗伯集

卷五

五

延綏巡撫梅友松

制曰朕總齊萬邦撫臨四裔一切制馭便宜  
盡以假大中丞不從中制也庸功既奏懋  
賞宜頒爾巡撫延綏等處地方贊理軍務  
都察院右僉都御史梅友松器宇沉雄才  
猷暢練筮官起部寮佐名藩執憲詰戎蔚  
起塞帷之望折衝厥難共推秉鉞之臣忠  
殫籌邊勲侔分陝立諸羌戍已之校定兩  
軍庚癸之呼塞上以安師中為最茲授爾

階中憲大大錫之誥命嗚呼周城朔方秦  
置上郡任惟一方之鎖鑰地當五路之襟  
喉無忘牖戶之綢繆用副朝廷之倚毗尚  
胥後命以祚爾庸欽哉

四川巡撫徐元太

制曰巴蜀天府是稱雄鎮撫臣內拊循百姓  
外控制西南夷至崇重也況以筦樞之階  
而當節鉞之任者乎爾具官某器識端凝  
才資敏練游更銓部共傳啓事之名敷歷

宗伯集

卷二十八

五

藩邦式著于宣之績入為京兆晉拜中丞  
方弭節於建昌旋迴戈於臚乃夷獠息整  
居之禍蒸黎有帖席之安以祚爾庸方舉  
奏凱之典憫勞以事勉從求退之章所司  
以爾最績來奏是用授爾階通議大夫錫  
之誥命嗚呼成功者退高標已遂于懸車  
得全者昌朝議未忘于推轂尚胥後命以  
答崇勲欽哉

遼東巡撫顧養謙



制曰今天下三陲安矣而獨遼左歲中虜遼  
左以孤懸之鎮列三面成而守非重臣有  
文武材者則誰稱保障哉咨爾具官某恢  
弘善斷個儻不羣志大而才有為任艱而  
氣不懾定浙西之亂軍無庚癸之呼墾蕪  
北之田人有史白之頌踐更藩臬簡畀保  
釐值三韓火敵之餘當萬里長城之任言  
可底績奮不顧身灑德澤於黔黎揚稜威  
於醜虜歲闋來奏朕庸汝嘉是用授爾階  
通議大夫錫之誥命今遼左稍息肩而江  
南災報踵至故命爾佐度支於留都蠲賑  
屢下積貯又虛國未有三年之蓄而民不  
能忍須臾待也救荒竒策安出乎勉矢心  
計弘濟時艱汝往懋哉

雲南巡撫蕭彥

制曰滇與貴吾南土也以遠在萬里外朕憫  
然念恩德之不究宣慎簡大中丞往填撫  
之視近地加重焉爾具官某器識高閎才

猷沉毅蜚英上第司憲名邦掖垣推賢直  
之聲卿寺擅寅清之譽肆建牙於貴竹暨  
仗鉞於滇南風肅部中民起朱帷之望威  
伸境外邊無赤羽之驚六詔舉安三年奏  
最茲特授爾階中憲大夫錫之誥命夫中  
丞職在撫綏輯和夏裔不欲其微功興事  
撓王畧也使有以安之而無以擾之如爾  
者足為功矣故下璽書以勞爾爾尚益殫  
忠竭節為滇人久述前狀

宣府巡撫許守謙

制曰內地撫臣持中丞節獨按治部中事而  
邊徼則以漢法戎索兼治夏裔夫夏裔皆  
吾民也故其任遇恩寵往往視內地重焉  
爾具官某器宇沉雄才猷暢練初從郡理  
入踐郎闡叅藩屏于湖湘執橐鞬于晉代  
望實並茂寄屬滋崇特晉秩于中丞旋移  
鎮于上谷乃能當機應變折衝于樽俎之  
間練士息民制虜于縵縵之末修我八事

于茲三年茲特授爾階通議大夫錫之誥  
命夫虜自歸命邊人得息肩緩帶二十年  
於茲微二三邊臣之力不及此惟是備不  
可弛寇不可玩詩人所以戒桑土也爾其  
念哉

宗伯集卷之二十八終

宗伯集

卷之二十八

五

宗伯集卷之二十九

北海馮琦用韞著

誥勅

江西布政使陳文燭

制曰方岳重臣所使總方畧一統類為吏民  
師帥者也有能暢宣德意惠安元元朕且  
下璽書尊顯之以風示天下爾具官某被  
華國之文抱匡時之器楓庭擢秀棘寺持  
平甘棠愛著於南淮棧樸風行於西蜀歷  
參行省暨長外臺資閱既深寄屬滋重俾  
爾左轄式是南邦來旬來宣民已慰黍苗  
之望之屏之翰朕方倚桑扈之功是用授  
爾階通奉大夫錫之誥命夫漢制二千石  
輒入為九卿而國家必使敷歷藩臬蓋詳  
試政事而重畀之爾自文學律令戶口錢  
穀靡所不綜靡所不効爾於諸艱可謂歷  
試已勉爾終猷朕且陟汝

山西布政使司左布政使李采菲

宗伯集

卷二十九

一

制曰國家建置岳牧臨制郡國以敷滂皇澤  
表率吏治不有鴻碩何常茲任我爾具官  
某才宏而敏行潔而端敷對大廷勤勞使  
職肆埋輪於近甸及陳臬於外臺游登四  
岳之階屬以三晉之重乃能正己率屬布  
德綏民業已畀爾節旄任以鎖鑰值茲課  
書之奏宜膺贊冊之光是用授爾階通奉  
大夫錫之誥命於戲民生在勤勤不墮爾  
已弘濟於時艱兵戢而動動則威爾尚申  
無替朕命

山西按察司副使李時芳

制曰邊臣驅馳荒徼櫛風沐雨以固吾圉此  
朕所隱念也程功敘勞宜從優典爾具官  
某才堪保障志在封疆初握算於繁司嗣  
分符於中土朕命廷臣舉非常之士可當  
一面者僉曰汝諧故命爾備兵塞下而爾  
政有弛張權能操縱名王受纓縻之約邊

氓有衽席之安圖爾舊功已贈新秩復以  
考績授爾階中憲大夫錫之誥命夫自大  
虜歸命中外之民皆有以自寧斯亦凜凜  
胡越一家之感矣無生邊蒙毋忘邊備脩  
亭障蒐卒乘惟此時也爾其懋哉

山西行太僕寺卿兼按察司僉事申維  
忭

制曰朕重邊備而稽馬政慎簡淵塞之臣以  
司之秩視內寺銜兼外臺吾于主馬之臣

宗伯集

卷三十九

三

非輕也爾具官某起自廷掄筮官壯縣三  
更夏省五任秦關馭歷滋深聲華彌著實  
心宣于考牧英畧暢于籌邊是用授爾階  
中憲大夫錫之誥命夫三晉邊虜而寧武  
稱要害地惟鎖鑰任惟干城朕所責爾不  
獨雲錦之效也爾其懋哉

山西布政司右叅議郭性之

制曰諸邊道分部而治以輯和民人糾虔衷  
士吾甚倚重之有能任我聞以外而固我

疆以內者壘書所首被也爾具官某猷為  
練達操行端嚴爰自地曹出司外臬宣勞  
持憲晉秩叅藩分守衝邊獨當要害才堪  
文武之寄政得夏喬之和茲已擢爾山東  
副臬而所司以爾最績來奏是用授爾階  
朝議大夫錫之誥命夫藩臬異司齊晉異  
地要以彈壓郡邑紀綱一方其重一也所  
至而治惟爾有之需爾之成嗣有崇畀欽

哉

宗伯集

卷之九

四

通政司叅議李觀光

制曰國家設通政即古納言與六曹並秩而  
卿所以司喉舌通幽滯也爾具官李某學  
紹庭聞名升軒對分符宰牧服采戎樞擢  
置銀臺游升華近而爾操持勤恪敷奏詳  
明利病皆得上聞詔令不致中格時惟乃  
績簡在朕心是用特授爾階奉政大夫錫  
之誥命夫三載考績實惟虞典乃虞廷之  
命獨先夔龍即所重可知已爾尚協比乃

長以出納朕命惟先朕則陟汝汝亦有無窮之問欽哉

浙江按察司僉事蘇濟

制曰朕方釐士習正文體而天下未盡應詔  
旨故命典學之臣文章德誼有兼長者往  
表正之爾具官某學博且純器閑而達首  
登鄉薦大對公車數歷曹郎晉持文柄爾  
乃祛浮華崇大雅斯以士則彬彬近正矣  
浙士正而天下之標嚮可漸馴也朕是以  
嘉汝授爾階奉政大夫錫之制命頃已晉  
爾官叅藩秦中矣秩在維垣任司分陝以  
經術飭吏治又非特載筆裁義明得失第  
甲乙已也往其懋哉

御史王之棟

勅曰朝廷欲知天下利病吏治善敗惟二三  
執法之臣以為朕視聽也故能以天下事  
入告於內而因以諭朕志於外則可謂能  
其官矣爾具官某器資端恪才識精明儲



自詞垣簡司憲典爾能悉心奉職正色敢  
言要務多見於披陳絕塞爭傳其風采茲  
以考最授爾階文林郎錫之勅命夫在廷  
之臣得言之又得行之者惟御史耳埋輪  
攬轡冰異人任也爾其懋哉

山西道御史孫愈賢

勅曰御史執簡殿中按行郡國察舉非法至  
要鉅也爾具官某器識高閑才資敏茂蜚  
英廷對奉職使垣簡畀西臺典司邦憲都

宗伯集

卷五十九

六

下著理論之績粵西高攬轡之風最績來  
聞朕心嘉悅是用授爾階文林郎錫之勅  
命蓋古稱御史比之權衡繩墨由其無私  
而素具爾爾既以直節簡在朕心尚益繩  
糾愆違舉刺得失以副朕振揚綱紀之旨  
欽哉

山東道御史劉霖

勅曰御史執簡而入持斧而出貞肅官常激  
揚吏治非雅亮勁正之士不易稱也爾具

官某器宇端凝才猷宣朗蜚英廷對宣譽  
使垣簡畀憲臺典司屯務剔蠹釐弊裕軍  
國之需揭綱引維識朝廷之體茲當考績  
朕用汝加茲授爾階文林郎錫之勅命爾  
已陛辭按事江右所貴按臣者不隨不激  
不茹不吐非獨以鷙擊霆迅為風采也往  
循厥官無廢朕命

工部虞衡司郎中程奎

制曰國有六職工居一焉乃若大工繁興綜

宗伯集

卷五九

七

理荒度其為繁劇則諸司無與並矣爾具  
官某性資敏練操檢清勤發跡賢科著聲  
繕部洵更水衡之署屬當鼎卜之時量物  
程材惟飭惟密及告成事維爾之能頃已  
擢貳光祿卿而所司以爾最績來奏是用  
授爾階奉政大夫錫之誥命夫光祿職專  
上供署在中禁而介卿寔左右之豈惟以  
是酬爾庸也亦惟挈前功責後效朕命不  
易汝其懋哉

刑部浙江司員外郎孫有敷

制曰天下事皆以三尺法為準若夫察麗求  
中則存乎其人焉爾具官某發軔鄉闈振  
鐸費序爰從胄監升列民曹以爾闢於文  
法畀爾欽恤之任而爾執心平恕擇法精  
嚴諸所平亮寃獄叅決疑奏翕然有明允  
之稱嘉爾最績是用授爾階奉政大夫錫  
之誥命夫天下郡國獄皆仰大司寇大司  
寇以屬諸曹郎下之按鞫于是乎終上之  
決斷于是乎始終始之間汝其念哉

宗伯集

卷三九

八

禮部員外董基

勅曰秩宗之屬華選也虞廷之命曰直哉惟  
清固知冰清冰直不得為秩宗屬矣爾具  
官某心本忠讜氣復恢弘射策春闈服官  
秋署庶平執法慷慨敢言雖在下僚靡渝  
貞亮旋賜還於北塞俾鳴佩於南宮夙夜  
惟寅于茲三載茲授爾階承德郎錫之勅  
命惟爾左遷未幾已晉華階朕無所忤于

言而無所宿怒于臣亦已明矣勉處中和用副朕意朕則汝嘉汝亦有終譽哉

戶部廣東司主事杜潛

勅曰度支之難尚矣急則病民緩則病國故夫智不能調盈虛術不能通輕重則吾弗任焉爾其官某才資敏茂器識醇明射策賢科分猷民部俾筦錢穀之任充使吳淞之間克理耗穰惟明出納程爾勞績已正郎聞茲授爾階承德郎錫之勅命夫今民

宗伯集

卷三九

九

力已窮國計告絀漏卮難塞竭澤可虞爾既受廷綸復縮司綬當亦有以寬國家之力佐百姓之急者乎勉充了事無廢前勤

兵部車駕司主事申用懋

勅曰駕部之任郎選甚高職在奉車屬在司馬亦以贊戎務佐籌策也爾具官申用懋器端而雅才秀而文射策春闈分猷夏省稽參惟允勤恪不渝庸展錯於邊籌實淵源於家學英資方銳大受可期茲以考績

授爾階承德郎錫之勅命於戲詩稱凡周之士不顯亦世本其所由顯以翼翼之猷在也爾既以稱職受此褒予尚益篤忠貞世濟其美以為國禎罔俾周士專美於前  
欽哉

吏部考功司署員外郎事主事張雲翔  
勅曰朕方綜核名寔天下吏治蒸蒸起矣進  
絀詳允則考功之司存績用既成壘書所  
首逮也爾具官某器宇端醇才資朗劭頃

宗伯集

卷五

十

從邑令擢置銓曹而爾清正無私恪勤匪懈別品流以開大公之路明黜陟以杜羣枉之門揆爾贊佐之勞宜有褒嘉之命是用授爾階承德郎錫之勅命頃移爾選部考功主計文選主銓此兩職舉而天下賢不肖得其平矣書不云乎知人則哲能安人爾其懋哉

河南開封府知府王見賓

制曰開封一大都會也風俗襟而市獄繁非

夫酌寬猛權緩急者弗任也爾河南開封府知府王見賓性行高雅明習政事出為理官入為比部中外皆稱其廉平擢守大邦剝理繁劇歲數不登以政為歲有擊強之明無烹鮮之擾朕甚嘉焉是用授爾階中憲大夫錫之誥命夫大梁當天下中四方所視效吾所以褒勞爾意不獨為開封也益弘爾猷比於潁川渤海風示百城垂則羣吏則子女嘉欽哉

宗伯集

卷三九

十一

直隸淮安府同知徐伸

制曰盤錯之郡二千石不能獨理也惟是倅貳之官是攝是贊匪資雋茂曷藉勸勸爾具官某持身端慎應事宏通簡自鄉閭分符壯縣畀之佐郡職在行河乃能夙夜在公恪勤匪懈民用不擾河以安流厥勞茂矣茲已擢留都計部而所司以爾舊績未奏是用授爾階奉政大夫錫之誥命夫留都根本重地而積貯天下之大命也稽覈

出入籌策札登爾杜敬哉無使治賦之最  
出治河下也

兵部武選司主事劉復初

勅曰大司馬本兵柄而分猷分念則厥屬寔

贊襄之郎選甚高不輕畀也爾其品

格高華衷裹謹直掄魁庶官權秀南宮筮

仕民曹踐更夏署才堪游志事請纓臣

儲既裕於轉輸邦政復明於茲授茲當課

最朕用汝嘉是用授爾階承德郎錫之勅

宗伯集

卷五九

十一

命古稱司武之署重於文昌朕文武弁所

非有所倚重也爾尚一心營職協比乃長

以清武階進用之路朕則有崇寄焉

刑部河南司主事董宋儒

勅曰法者天下之平也覆讞論報皆在諸曹

郎而後大司寇取衷焉爾具官某才猷敏

達器識醇明奮跡春闈列官秋秩而能明

恕折獄恪守慎官小大以情辟宥惟允茲

以考績授爾階承德郎錫之勅命於戲先

王議事以制不為刑辟今法禁詳矣而吏弗任舞文析律元元安所必其命哉勉思教恤以稱朕止辟之意

大理寺評事雍之可

勅曰國家設大理奉三尺法以平庶獄非明慎之士不輕畀也爾大理寺評事雍之可起家經術司國刑章庶平不苛文法無害綜爾勞績不愧其官是用授爾階文林郎錫之勅命夫廷評天下之平也有司讞議所不能決者移廷尉平之廷尉一頃而用法者緣為輕重矣爾尚明罰勅法察麗求中比跡徃哲尚亦有終譽哉

中書舍人劉綵

勅曰一藝一能之士皆得列在三官及于恩數不以途格限也爾具官某才度明敏器資馴雅操鉛槧之業在侍從之班日月久矣恪勤不怠是用授爾階徵仕郎錫之勅命自爾執筆給事左右錫命者三矣周旋



嚴禁游被恩渥可不謂榮焉方圖爾勞無  
忘茲飭

山東兗州府同知高自修

制曰東魯控河濟通徐泗故稱望郡長貳雖  
異與朕共理均也爾具官某器識通明才  
資敏練兩更壯縣再佐明邦庶靜守官精  
勤集事課書稱最薦贖交升茲已陟爾留  
都幕府而所司疏爾舊績是用授爾階奉  
政大夫錫之誥命夫留都根本地也督府  
主兵柄文臣參軍事意宏遠矣南北並重  
文武相資益茂爾猷以光朕命

廣西梧州府鬱林州知州江龍

制曰吾甚重考課而念遠方之吏非有勞無  
過及有任舉者不得考而遠方使者不時  
至其程功見效被璽書者十不得一焉爾  
廣西梧州府鬱林州知州江龍以鄉薦入  
官越在荒服倅我晉興守我左陽比于今  
三仕不易地十年不易節朕甚嘉之茲授

爾階奉直大夫錫之誥命嗚呼吾何爾述  
之有綜名實累功效以登進羣吏即萬里  
不難見也爾無毀成朕不忘遠欽哉

山東濟南府德州知州趙可學

例曰國家仰東南以給而德州實為縮穀是  
非盤錯地守不易稱也爾具官某才諳精  
明猷為敏練初宰劇邑擢守通津爾乃益  
厲精修克堪繁鉅理絲無擾游刃有餘茲  
以三年課最特授爾階奉政大夫錫之誥  
命

宗心集

卷十九

五

今天朝廷錫命臣子視其事繁簡以為程  
危爾有終朕且陟汝

順天府涿州知州王道定

例曰國家錫命程臣子勞闕而畀之若輦轂  
近畿股肱重地固非他郡大夫比也爾具  
官某敏練之資通達之識筮官首邑繼典  
大州而爾治劇有餘理焚無擾計書稱最  
從事獨賢是用授爾階奉直大夫錫之誥  
命夫親民長吏所貴撫摩節約使民有寧

宇不以飭厨傳稱過使客為工也詩不云乎民亦勞止迄可小康爾其念哉

直隸揚州府推官李春開

勅曰郡國治效無如政平訟理而鞫讞之任獨屬理官執法之吏明主之所重也爾具官某起家齊魯司理維揚修憲令以守官緣經術而飭吏令聞蔚起最績來聞是用授爾階文林郎錫之勅命朕念律令繁多而不約比詔所司申定條貫以與我司憲之臣共之書不云乎爰制百姓于刑之衷刑之不衷民之多僻爾慎念哉

廣西梧州府推官莊敦義

勅曰朕念遠方之民猶轂下也故擇良司理專推鞫之任既有成績可後褒嘉爾具官某發軔賢科鳴鐸師席朕以明刑弭教之美擢爾理官而爾廉勤奉公明慎折獄芳猷既著茂績來聞是用授爾階文林郎錫之勅命夫蒼梧據九嶷之勝當五嶺之中

漢法雖懸夷風未革必使萬里之外知有三尺之平益勵初誠以永終譽欽哉

陝西鞏昌府推官任應徵

勅曰獄者萬民之命臺使者有所按鞫輒以屬理官不獨一郡也爾具官某器識端凝才猷通暢爰從上第司憲名邦而能砥礪官方精核吏事五刑惟允庶獄無寃積有年勞謄於薦敘是用授爾階文林郎錫之勅命夫鞏昌於關中稱望郡比歲不登民食寡乏或以饑寒離於理朕甚憫之爾旣以治行褒矣其益務平亭寃抑領行寬大以便安百姓稱朕意焉

山東樂陵縣知縣趙永祿

勅曰古稱齊地人物輻輳衣被天下最繁劇矣非才明有司烏能勝其任焉爾具官某始司教鐸繼領邑符嚴而不淺明以有執四郊無擾三尺常懸吏戢民安令行禁止茲以報政授爾階文林郎錫之勅命夫所

貴長吏者寬猛並用緩急有槩故足稱也  
詩不云乎豈弟君子民之父母爾往懋哉  
無失詩人之旨

浙江温州府樂清縣知縣吳華

勅曰明主不以浮說加工寔之上故雖譽言  
日至必叅伍其理効而後褒勞之典行焉  
爾具官某起家甲第試宰名封操行清修  
勞心撫字廉平不擾悃幅少文薦牘屢聞  
程書稱最是用授爾階文林郎錫之勅命  
宗伯集

卷三九

六

夫東嘉之俗儂巧囂訟可以大度長者坐  
而鎮之難用苛細操切理也移風易俗還  
之朴茂朕且觀爾德化之成焉

陝西西安府盩厔縣知縣南邦化

勅曰以關中歲時之不易朕夙夜念之未有  
奇策惟慎簡長吏使得各行其意以安民  
而已爾具官某器資端飭才譎茂明爰自  
廷掄遴司邑牧而爾精勤集事節愛宜民  
蔚有賢聲播于朕德是用授爾階文林郎

錫之勅命夫盤屋西京之屬也漢世循良  
惟京兆內史為最盛爾尚悉心營職比跡  
往哲嗣有顯陟不汝靳也欽哉

直隸真定府隆平縣知縣林天秩

勅曰漢良吏治行卓絕乃得被璽書夫奉法  
循理亦足為治矣何必奇也爾具官某向  
以鄉闈之秀往攝師席蒸蒸有造士之效  
故擢為邑牧乃能平易近人廉明為理庭  
無疑滯民以和寧斯亦稟稟德讓君子矣

宗伯集

卷之九

九

是用授爾階文林郎錫之勅命蓋吏治之  
弊往往驚虛聲無實效亟褒進悃幅之吏  
示天下以向往勉爾官成無失朕意

直隸鳳陽府定遠縣知縣孟醇

勅曰定遠

高皇帝湯沐地令甚重不易稱也爾具官某  
脫穎鄉闈分符壯縣邑有可書之績民切  
已去之思歲計有餘名實相應祥琴在御  
化瑟方調茲已補爾羅山而所司以舊績

未聞是用授爾階文林郎錫之勅命羅山  
吏民不相得故命汝往蒞之朕且挈前功  
責後效矣勉爾終猷以須隆任欽哉

山西平陽府翼城縣知縣卜自用

勅曰百里之衆宅心於今有能崇憲明理惠  
我元元朕且下璽書寵異之爾具官某擢  
秀鄉聞蜚聲民牧兩治壯縣數列薦章以  
歲時之不易而四境晏然民用不擾是可  
以觀政矣茲授爾階文林郎錫之勅命夫  
絳晉故都也民勤力嗇于用其尚有陶唐  
氏之風耶國儉示以禮朕且需爾德化之  
成焉

直隸池川府東流縣知縣陳承芳

勅曰朕保惠元元責寄長吏其有奉法循理  
登明課最者則褒勞之典行焉爾具官某  
起業鄉闈蜚聲儒校嘉其經術試之吏材  
民以惠孚事由敏集休問翕然著焉茲以  
奏績授爾階文林郎錫之勅命夫士砥礪

名行始未嘗不銳而後稍異也爾尚益懋  
遠猷永終令譽朕且觀爾成而顯庸之爾  
往欽哉

陝西鞏昌府通渭縣知縣井濟博

勅曰秦隴遠垂天末非有露積而關內流移  
以為歸非良有司誰當循拊之者爾具官  
某起自鄉闈遠司邑牧三載守羔羊之節  
四郊有鴻鴈之安蔚有賢聲騰於薦敘是  
用授爾階文林郎錫之勅命夫關西苦旱  
江北苦水此兩者朕所側身以憂者也以  
爾治邑有異等之效故擢爾為邳州守盤  
錯之地爾才適宜圖爾舊勞佇觀新政

河南汝寧府汝陽縣知縣劉汝康

勅曰夫令者所使承流宣化寄元元之命者  
也治行純茂而不褒異士將何勸爾具官  
某才猷宏暢識度精明爰自賢科出司劇  
邑乃能勤恪集事第宜民考試功能名  
實相應是用授爾階文林郎錫之勅命於



戲漢世良吏稱盛而潁川中年為之最則以敷政中土聲聞易訖也爾儀圖之其則不遠往懋乃績尚亦有終譽哉

戶部照磨楊應尾

勅曰人臣不愛其死以報國吾何惜一命不以慰其子而況其子又任職之臣乎爾具官某乃原任兵部車駕清吏司員外郎繼盛之子以忠貞之裔抱練達之才特荷恩階筮官計部參稽登耗休有令聞可謂不愧其世矣茲以擢爾太常掌故而所司疏爾舊績故授爾階修職郎錫之勅命惟爾父之忠烈爾是以及此嗚呼念哉

順天府宛平縣主簿盧茂

勅曰輦轂之地非獨其令重也即丞若簿亦必登簡俊良治成得奉璽書外邑無敢望焉爾具官某學世其家才適於用發身監冑典職簿書廉明守官勤恪集事茲以三年考績授爾階修職郎錫之勅命夫朕所

需者才耳不以途格限天下士勉管爾職  
無怠于成

鴻臚寺鳴贊衛天命

勅曰朝廷俯臨萬國非以禮則天下不肅此  
臚人所為設也爾鴻臚寺鳴贊衛天命發  
身監胄典職廷儀歲時滋久而恪勤不怠  
免於過愆則亦宜有以褒之茲授爾階登  
任佐郎錫之勅命服此休嘉無忘茲飭

宗伯集卷之二十九終

宗伯集

卷之二十九

五

擬進講記

吾師琢菴馮公少負異才好學能文通于當世之故年十九歲入為翰林即隱然以天下自任連為講官者十餘年其侍上最久啓沃最多忠愛脫切上顧而眷之其所進講章有通鑑若干卷講章之義舊取于明白簡近便上省聽自本旨字句之外不敢旁引更端以

宗伯集

卷三記

一

日為說有之自公始蓋借古人媿美得失之端為今日藥石攻療之論此公之用心微曲堅苦非人之所能知也予讀其書竊有感焉夫世之君子愛其君盡言而不諱者多矣然幸而見聽者十不見聽者十九何也夫人與人相與直言其人之善言之而過其實雖好諛者亦必內慚而不肯當至與言昔人之善

表有不羨者也直言其人之不善言之而至于甚雖樂受者亦必外忿而不能容至與言昔人之不善未有不笑者也豈惟羨之而已自顧其行有不類是其能已乎豈惟笑之而已自顧其行有類是其能安乎然則吾雖十言而十見聽可矣由是論之世之君子欲告其君以言者孰有善于公者哉今觀公之論漢武帝也有曰武帝待衛青公孫弘親之不重待汲黯重之不親然總之冠亦見不冠亦見踞廁亦見可見古者君臣相親無少間隔故其下易事其上而上易知其臣也夫天下之患莫大于君輕其臣而相隔尤甚盖有所輕則尤有所重若一相隔則無復有親者矣又曰武帝之臣惟弘最稱上意而最寵任黯屢忤

上意而屢賜告外補然淮南之謀不畏  
寵任之弘而畏屢賜告外補之黜何也  
見椎魯戇直之人一味忠鯁在人主面  
前尚且執德不回觸忤不顧更有何利  
可以牽動何人可以搖惑若阿諛遷就  
之人委曲多端在人主面前尚且支吾  
變轉後見大利大害豈有不趨避之理  
此弘所以見輕而黜之所以見重也人  
宗伯集  
卷三  
三  
臣觀此則知所以自處人君觀此則知  
所以任人矣其論和帝也有曰帝與鄭  
衆決策而誅竇憲豈非英斷然外戚之  
禍除而內宦之權重原內權所由起始  
于有功有功始于決策蓋帝之所以不  
與股肱大臣謀者以素不與外臣親接  
耳人主常延見大臣無事則諮訪得失  
有事則參決謀議若常不相親即有事

亦難獨召召之則機露而事敗勢不得  
不謀之于內謀之于內無論未能成功  
即成功亦有後患豈非後世之永鑒哉  
其論宣帝也有曰人臣言有不當只合  
置之而不必加以罪即真有罪亦宜使  
廷臣評其得失法官定其輕重豈有獨  
付執金吾之理自此端一開而後世凡  
有觸廷輒下詔獄徃徃以笞掠殺之則

宗伯集

卷之三記

四

宣帝之殺蓋寬饒為之作俑也其論靈  
帝有曰帝作列肆于後宮釋袞冕而衣  
商賈之服舍大輅而操四驢之轡不過  
一時為戲而書之史冊遂為千古笑端  
甚矣舉動不可不慎也蓋人君常御大  
廷禮法嚴重身心自然收斂言動自然  
端莊故非僻之干無自而入若身居大  
內不接羣臣所居皆燕閒之地所與皆

狎昵之人故非禮之動乘是而起宮闈  
深邃見謂無傷而不知天下傳之史臣  
書之矣齊桓公好紫而紫遂勝朱漢靈  
帝好驢而驢遂勝馬若移其好以圖天  
下之政務收天下之賢才則何才不得  
何事不理乎又曰天下財利名為泉貨  
原當流通必無聚而不散之理布之人  
間則上下流通為天下之用收之府庫  
則緩急有賴為軍國之用若藏之內帑  
積之不用則始為私藏終為禍端財聚  
者民散多藏者厚亡聚乃所以為散利  
乃所以為害耳靈帝私藏于西園未幾  
而散德宗私積于瓊林大盈未幾而散  
荀勗明王以不蓄為富以不貪為寶真  
有見哉其論元帝有曰恭顯所以權傾  
中外者以帝妻以政事羣臣因以關決

而宦官得政之由實始于武帝游宴後  
庭不見羣臣大凡人主不見羣臣則中  
外隔絕而權必旁落雖以武帝之英明  
僅不當其身而于子孫見之其為監豈  
不甚著又曰在周禮內官統于冢宰故  
多治自秦以後大臣制于內官故多亂  
大臣以中貴喜不喜為去留中貴以屬  
託行不行為喜怒則未見其可以為治  
也其言精彩切愕有為而發悉中于當  
世之故如此然自公言之託事造端微  
見指歸而未常以言為名自吾君聽  
之隨類相求往往而解而未常有聽之  
迹嗚呼此世之君子以言告其君者未  
有善于公者也昔歐陽修有言天下之  
得失生民之利害社稷之大計惟所見  
聞而不繫職司者獨宰相可行之諫官



可言之故士學古儆遺者任于時不得  
為宰相必為諫官蓋兩士之欲有言者  
非諫官莫能耳嗚呼孰知夫今之言不  
在諫官而在講官乎然愚推歐子之意  
以謂人臣事主苟得言以為幸焉況乎  
吾能言之而又能行之其幸尤何如也  
昔唐宋之制士由諫官為宰相十常六  
七則夫能言而又能行之者亦已多矣  
本朝宰相惟翰林得為之而諫官不與  
焉其言而行之者其誰邪今公之書凡  
天下之得失生民之利害社稷之大計  
見于所講說者豈止于諫官之所能言  
者乎公之位旦暮得為宰相然則能言  
之而又能行之者其惟公耶愚小子請  
即以公前日之所言還以責公後日之

所行耳

翰林院檢討門人李騰芳記

宗伯集

卷三記



翰林院檢討門人李騰芳記

宗伯集卷之三十

北海馮琦用韞著

經筵講章

天地節而四時成節以制度不傷財不害民

這是節卦彖辭人君當節制財用的說話節是樽節制是限制度是用財的額數孔子說節之為道甚大天地所以成歲功帝王所以成治功皆不外此以天

宗伯集

卷三十

一

地言之春夏秋冬四時不忒歲功成矣而四時之所以推行者則以一歲之中有十二箇節序如有限制的一般陰極而陽生則為春為夏陽極而陰生則為秋為冬陰陽相生寒暑相代所以四時之序成而萬物之宜遂也天地尚不能以無節而況於人乎人主富有四海天下之民皆其民天下之財皆其財若任其侈心不加樽節則費出無經供應難

繼而傷財害民所不免矣是以聖人體  
節之義立為限制豐約多寡都有箇一  
定之數量地所出以詔入而不得過取  
量民所入以為出而不得濫用上之用  
度常守着額數務使其用可繼財無匱  
乏之憂下有徵輸亦據着額數務使其  
賦易供而無誅求之害蓋聖人所以安  
民阜財其道不過如此節之一字天地  
與聖人皆不能外也節之時義大矣哉

臣嘗因事而繹思之自古願治之主未  
嘗無愛民之心至於財用未必能節蓋  
徒見目前用度之繁難省府庫之積可  
恃耳不知朝廷費用皆取之庫藏庫藏  
蓄積皆出自小民用之甚易供之甚難  
有司畏考成之罰則嚴刑峻法以徼之  
百姓憚差徭之重則離鄉去井以避之  
浚削百端流弊萬狀人君深居九重何  
從見聞如使念及於害民則財不容以

不節慮及於傷財則度不容以不制矣  
仰惟

皇上軫念民窮留心國計裁冗祛浮之詔既  
三令而五申憫災蠲賦之恩已朝聞而  
夕布傷財害民之事可保其必無矣惟  
是天下當水旱之餘有兵革之警在倉  
庫未足三年之用在田野又無終歲之  
儲財力之困窮民生之憔悴蓋已極矣  
宮庭有日益之費買辦增歲進之金塞

宗伯集

卷三

三

上之年例滋繁江南之傳造未減今日  
比之舊額則為暫加後日因而相沿則  
為常例例外生例年復一年財安得而  
不傷民安得而不困乎臣愚以為宜酌  
數年多寡之數制一定出入之經減不  
急之工程罷非時之宣索覈凡鎮之錢  
糧以杜侵冒寬百姓之賦役以省追呼  
無藏富於國而藏富於民無積之內府  
而積之外府則節與制可謂兼得而財

與民不至兩傷矣伏惟

聖明留意

昭茲來許繩其祖武於萬斯年受天之祐  
受天之祐四方來賀於萬斯年不遐有佐  
此是大雅下武篇詩人美武王之孝垂  
法後世的說話來許指後世子孫說繩  
是繼武是往迹遐字即是何字佐是助  
詩人贊美武王說道武王之為君永配  
命而求世德成王乎而式下土其道昭

宗伯集

卷之三

四

明如此固一時所為順應亦萬世所當  
效法者也使來世子孫繼祖宗之統緒  
即思守祖宗之家法天命所在亦如其  
仰配世德所在亦如其作求這是步步  
跟着先王行而克繩其武矣夫祖德與  
天心相合者也能繼祖武則上天眷顧  
之命不能違焉舉凡百順之休徵如祿  
位名壽皆將申錫於冲漠之中自今於  
萬斯年膺曆數之傳而聿懷多福有不

受天之祐者乎然天命與人心相通者也既受天祐則臣民歸向之情不能外焉舉凡四方之君長如綏甸要荒皆來朝賀於輦轂之下自今於萬斯年藉藩屏之力以夾輔王室有不得人之助者乎此固後王法祖之效而定武王裕後之休也其能續三后之緒而配於京宜矣臣嘗繹思是詩必受天祐而後可得人心必繩祖武而後可擬天命則知法祖者得天得人之本也然法祖以心不徒以迹周家繼世之君莫賢於成王考其所以為孝則不在紹庭上下儀式典刑之間而在夙夜宥密日月就將之一念耳仰惟

皇上則大疑圖宅中建極嗣

二祖之鴻業締造每念其艱難席

列聖之遺休積累不忘於熙洽垂衣裳於五位執玉帛者萬邦固已膺永命之符獲

多助之應矣顧先烈雖切於觀揚而志  
事尚歎於繼述

郊廟之祀不親則

天地

祖宗之神靈無由感格

朝賀之儀久曠則

君臣上下之情意不相流通似非所以敦孝  
思而光世德也臣愚更願撫輿圖而導  
保治之謨披訓錄而究傳心之要

宗伯集

卷之三

出入起居有節一動息而罔愆

饗祀朝會以時合神人而胥悅以此纘承

先緒即以此佑啓後昆非但配三后而有光  
且將垂萬年而足法矣臣等不勝顛望

之至

洞酌被行潦挹彼注茲可以饒饒豈弟君

子民之父母

這是大雅洞酌篇召公戒成王以脩德  
愛民的說話洞是遠行潦是道上無源



之水挹是取注是傾注蒸米既熟加水再蒸叫做饑饉是酒食豈弟是樂易的意思君子指王說詩人說道上流潦之水水之至微者也然從遠處酌之挹取于彼傾注于此尚可以沃米蒸飯而為酒食之用況於有德之君豈不為民之父母乎蓋父母愛子不過能體其心順其欲使之得所而已我君子之德豈馬而和樂弟馬而簡易以慈祥愛物之心

行平易近民之政百姓有當養的則體其好逸惡勞之情以悅安之撫摩鞠育與父母畜養其子的一般百姓有當教的則體其好善惡惡之情以強教之勞來匡直與父母成就其子的一般以此而稱民之父母舉斯心以加彼何難之有哉蓋元后作民父母本以子民為責只因上下之分太隔以致君民之情不通故召公戒成王不稱威嚴而稱豈弟

不曰大君而曰父母見保蒼生保赤子  
其心一也書經說臨下以簡御衆以寬  
大學稱民之所好好之民之所惡惡之  
此之謂民之父母蓋煩苛則上下之勢  
逾隔樂易則好惡之情自通情通則藹  
若一家勢隔則遠於萬里故觀民情之  
通塞而治道之隆替可知已仰惟

皇上心軫困窮政崇寬大

德音時霽國課屢蠲吏有害於民者必懲法

宗伯集

卷三十一

八

不便於民者必罷真可謂豈弟之德父  
母之心矣然議蠲議賑而民困猶未盡  
蘇懲酷懲貪而吏弊猶未盡革其故何  
也養子者必慎擇乳保而勤視其燥濕  
養民者必慎擇守令而勤恤其饑寒然  
乳保嘗視主人之意肯以為輕重守令  
亦視君上之趣向以為勤惰故欲安民  
生在興吏治欲興吏治在

皇上勵精勤政之二念而已臣愚更願復臨

御之視以圖上理發稽留之奏以達下  
情恤民而崇簡易之風課吏而求循良  
之實將見

主德無不下究民情自爾上通惠此蒸黎真  
如父母而凡有血氣莫不尊親矣伏惟  
聖明留意

鳳凰鳴矣於彼高岡梧桐生矣於彼朝陽  
萃萃萋萋離離喑喑君子之車既庶且多  
君子之馬既閑且馳矢詩不多維以遂歌

宗伯集

卷三

九

這二章詩是成王與其臣同遊卷阿召  
公作歌諷以招致賢才的說話山之東  
叫做朝陽萃萃萋萋是梧桐生長之茂  
盛離離喑喑是鳳凰聲音之和美君子  
指成王說庶是衆閑是習馳是可以馳  
驅矢是陳遂歌是繼王之聲而歌即是  
和歌的意思是時曾有鳳凰來儀故借  
以起興說道鳳凰鳴矣則于彼高岡之  
岡何異忠賢之士生於聖世也梧桐生

矣則于彼朝陽之地何異明聖之主立  
于汭朝也然惟梧桐之生也萋萋萋萋  
而盛然後鳳凰之鳴也雖雖喈喈而和  
何異聖明在治朝而後忠賢生聖世也  
盖明良之盛相得而成上下之交有待  
而合賢才之進用顧人君之招來何如  
耳我君子踐至尊之位當全盛之時自  
乘輿以外皆車也既閑而且馳矣以此待  
閑以內皆馬也既閑而且馳矣以此待  
天下之賢不過取之衆多閑習之餘而  
足也君子寧不思所以用之乎臣之陳  
是詩也原非敢侈詞章以為多也不過  
因遊覽之餘發為聲詩王歌之而臣繼  
之聊以相賡和而已臣謹按召公之詩  
以梧桐比明主以鳳凰比賢臣以車馬  
衆多閑習動其君招羅賢俊之思驟而  
聽之則其言易入徐而繹之則其味無  
窮可謂善於悟至者矣然實由上下同

心情意相浹故得因物託諷隨事納規  
臣言而君從君喟而臣和宛然賡歌景  
象以太和所以在成周宇宙間也自是  
以後堂陛森嚴獻納但託之奏章傳宣  
聖明僅形之批荅意遠則難以言盡分隔則  
難以情聯即欲矢詩遂歌何由而達哉  
太祖高皇帝作大誥首以君臣同遊為言其  
旨深矣仰惟

皇上側席求賢轉圜納諫獨運九重之上未

宗伯集

卷三十一

二

嘗于遊而于觀弘開衆正之途俾之在  
位而在職固已稱明良之會洽喜起之  
交矣惟是調攝之時常多則君臣之情  
漸隔臨御之儀久曠則官府之體漸分  
憂深之堯甫問之臣尚之獻典陳詩之  
益況於遠方逖聽之士安得望屬車之  
塵而吐其忠款乎臣竊以為深處法宮  
不如泮渙優游之樂靜思治道不如都  
兪賡歌之歡況動盪天和則宸襟彌暢

詠歌至德則令問彌章上下之情既通  
中外之勢不隔梧桐鳳凰之什不但媿  
美於成周而元首股肱之歌亦且同符  
于虞舜矣伏惟

聖明留意

民亦勞止汙可小休息此中國以為民速  
無縱詭隨以謹愒愒式遏寇虐無俾民憂  
無棄爾勞以為王休

這一章詩乃是周時同列相戒欲其遠

宗伯集

卷三

十二

佞安民的說話止助語詞汙字解做幾  
字中國指京師說速是聚詭隨是不顧  
是非妄為隨順謹是斂束愒愒即是誼  
諱休是美詩人說道國本於民今民亦  
勞矣庶幾可使少休息乎然京師者民  
之所聚也必先布德惠於京師而後可  
漸次及於天下使渙者萃離者合則勞  
者可休矣然民之所以不安者以詭隨  
之人不論理之是非事之可否專一阿

媚曲從上亂主聽內結主心然後肆其  
寇虐以及於民故民常憂苦而不得休  
息似這等人必不可姑息縱容小則斥  
逐大則誅戮使佞詞利口有所斂束而  
不得肆則諛譁省而朝廷不擾貪殘暴  
虐從此遏止而不復行則政令平而民  
生獲安甚無使之在位在職而為百姓  
愁苦也若此者皆是臣子所當為豈敢  
言勞但爾事主既久則效勞於王家已

非一日尚其慎終如始無棄前功使朝  
無亂政之人野無殃民天下後世稱吾  
君之聖明而休美之聲流於無窮則吾  
與汝所以報朝廷而忠吾君之職分也  
按詩人念民之勞圖民之聚而無俾民  
以憂一篇之中三致意焉然必遠佞而  
後可以安民民安而後成其君之休美  
書稱柔遠能邇而先拒絕壬人意亦如  
此蓋臣至於隨則跡似順而易入隨出

於詭則心多詐而難窮使人主但喜其  
阿從即奸臣得遂其蒙蔽可以邀寵可  
以行私故臣受其利可以亂是非可以  
播殘虐故國受其害詩人探其情曰詭  
隨狀其態曰悖俶究其害曰寇虐此皆  
事有相因勢所必至者蓋人臣事君激  
亦不可隨亦不可人君聽言激切之罪  
淺而詭隨之害深也仰惟

皇上乾健執中離明御下賜蠲賜賑澤已布

宗伯集

卷三十一

十四

於窮簷懲酷懲貪法必行於惡德舉直  
錯枉親賢遠奸衆正之路已開孔壬之  
途已塞矣然歲進滋繁帶徵未減則民  
勞尚未休是非互執邪正互攻則誼誨  
尚未息君臣太隔則膏澤之下於民也  
難喜怒稍形則阿隨之乘於上也易惟  
天下國家之事以天下國家之心處之  
則都俞不嫌於隨而吁咈亦無嫌於激  
矣伏願溥大惠以圖中外之安秉至公



以辨忠邪之品謹好惡以杜詭隨之漸  
嚴彰靡以遏寇虐之萌使德澤盡及於  
民即休美獨歸於上則昏悞不歌於周  
雅而喜起可繼於虞庭矣伏惟

聖明留意

易无思也无為也寂然不動感而遂應天  
下之故非天下之至神其孰能與於此

這是易經繫辭第十章贊易道神妙的

說話易指著卦說寂是靜感是感觸孔

子說大凡物有心的便不免有思慮有  
營為易之道本自无心何思之有思且  
无之何為之有方其靜而無感的時候  
著在櫝卦在策機緘朕兆都未形露是  
何其寂靜之至及其動而有感的時候  
著方樸卦方感天地萬物無不周知是  
何其感通之速夫天下能動不能靜能  
寂不能通的都不叫做神惟至靜而可  
以待天下之動至寂而可以通天下之

感則是无思而无不思无為而无不為  
若非天下至神之理但有一毫智力一  
毫思為豈能至於此哉夫著卦之用在  
感而能通所以感而遂通者乃在无思  
无為寂然不動可見天地間道理自無  
而有人心上作用以虛而靈若先有成  
心後有滯跡則事物未來此心已為所  
動本原已不澄徹縱使一事偶合而推  
之天下必有滯而不通之處故聖賢論

道理則曰何思何慮論知能則曰不慮  
不學詩贊文王不識不知魯論記孔子  
母意母必總之皆无思无為之本體也  
仰惟

皇上道契重玄心涵太始淵峭靜攝時幾不  
懈於九重機務親裁明見常通於萬里  
雖古所稱不思而得無為而治亦何以  
加然易所貴於天下之至神者以其靜  
而能動虛而能應雖能動能應之後此

心仍是常湛常寂如洪鍾隨叩而鳴響  
止而復靜朗鑑過物而照形過而不留  
故能動靜互根體用兩妙非指寂寞清  
淨而謂之無思深居簡出而謂之無為  
也臣愚更望觀道體于喜怒哀未發之前  
忘成心于好惡已形之後一理勝衆欲  
俾靈臺不擾于紛華一日謹萬幾使睿  
慮常周于豐蔀懋思作聖之功乃所以  
完無思之體建大有為之業乃所以究  
無為之用所謂天下至神者不在易而  
在

聖心矣臣愚不勝顛望

宗伯集

卷二

七



